

孔林記

王思任

地自生孔孟而鄒魯之鄉遂馥朋友之義千里登堂予於先生何分也而可有過門之憾耶則既登泰山以望其氣矣從山麓東行二百里至曲阜石俱骨走渡泗水忽數千頃蒼鬱鬱至聖林耶由輦路過洙水橋有石人二劍笏儼如石麟虎四華表二肅拜享殿之下觀子貢所植楷先爲子思墓左伯魚上則吾夫子之藏也少昊氏雖墟於此而奎婁之精中和之氣至仲尼而始會泗水却流黃玉提命此事不可語癡人第烏巢荆棘非有目者可章章乎生死事大聖賢更切於英雄夫子常敬觀人葬卽延陵坎子猶往覲之以此知向離食巽環泗迎洙大之葬

道藏輯要

天下名山記
山東孔林王

矣

軫集四

聖人歎抑聖人之葬聖人也吾見若堂者矣而斬板封鬣不取侈秦尙夫子之志乎哉右三楹題子貢廬墓處安意泰山將頽夫子獨語之子貢而他日多學多能諄諄焉欲點紅爐之雪必身後事命子貢襄之聖人亦有密教不可得而聞耳林木皆遠方弟子手植至不可知名而孔氏纍纍環塋垣之外三千年不異處堯舜無此盛美也辭墓登樓觀嶧山一點正案東南而顏母尼山啟聖顏林俱在顧盼間從魯圭門入觀闕里魯兩生引由毓粹門經金聲門詣大成殿瞻拜聖容以文宣王冕旒鍾鼎尊嚴壁有行教像顏子隨後者是顧愷之畫小影像按几而坐者是吳道子畫恨不見司馬朴所藏輞川筆定別有一種文氣

道氣也殿之後曰寢殿曰聖蹟殿殿之前曰杏壇二字黨懷英
書至中門左有夫子所植檜文陽紐枯而不朽米元章贊殊可
讀徘徊奎文閣下天風穆冷古柏森然碑自蔡中郎陳思王以
下不可勝捫左爲家廟詩禮堂古槐瑰石不知幾何歲月右爲
啟聖殿金絲堂則魯共王壞壁處也髣髴有人罄咳云乃從壁
水出櫺星門而禽臺巽圍五父兩觀以大火正酣不能悉覩記
止從陋巷窺顏井謁顏廟規制禮樂稍殺於夫子而一窺天人
受此華報斯亦好學之明效也次日從稷門出看郭外坦夷如
堵望舞雩臺過九龍山忽憶李文正之句一方煙火無庵觀三
氏絃歌有子孫真能話曲阜縣者矣日午抵鄒謁孟廟古柏蔽
芾樂正子配焉東祠孟母傍有小石像是孟子跪而受教者面
稍肥似帶瘰氣庭前有元祐時所植四大槐或曰孟母夢泰山
神乘雲至嶧而墮乃生孟子由是觀之孔孟之秀皆秦岱所鍾
者也不二百里內而數聖比肩負絕今古予出胎以來仰止夢
寐又以一日於役得慰所私虛往寶歸其視皓首牖下汨沒塵
中者得失幸否相去何似時萬曆丁巳六月二十八日紀此志
榮若夫贊述詩歌則旣遊聖人之門矣以讓能者

道藏輯要

天下名山記
山東孔林王

卷

軫集四